


Swiharhi swi ya elwandle



Swiharhi swa nhova, swinyenyana
na switsotswana swo huma
e Afrika a swi lava ku vona misava.
Kutani swi kunguhatile ku teka
rendzo swi famba hi byatso.

Swi tiphinile hi masiku yo sungula
ya mavonavona ya rendzo ra
swona kambe endzhaku ka
masikunyana, swi sunjurile ku
phirheka kutani swi sungula ku
holova.



Wudi N'wagongondzwana
u sungurile ku lwa na
Peter N'watuva. Loko va
ri karhi va vumbuludzana,
N'wagongondzwana u boxile
mbhovo ebyatsweni.

Mati ya sungurile ku nghena
ebyatsweni. Mbhovo wu ya wu
va lowukulu. Mati ya nghena hi
xitalo endzeni ka byatso.



Swiharhi a swi vilela leswaku
byatso byi nga mbombomela
kutani swi ta nwela swi dlaya hi
mati.

"Mbvuu, mbvuu, mbvuu," ku vula
N'wanyoxi wa migingiriko, "A hi
tirheni swin'we hi siva mbhovo."
Kutani swiharhi hinkwaswo swi
khomisana swi ringeta ku siva
mbhovo swi lunghisa byatso.




Phaphapha, phaphapha,
phaphapha.

Swinyenyana swi ringeta ku
tlakusa byatso ku suka ematini hi
ku ba timpiko ta swona kambe a
swi nga ri na matimba.

Ndlopfu yi tswonga mati ku suka
etshakwini ra byatso kutani yi
ma chela elwandle.

Xwaa! Xwaa! Xwaa! Xwaa!



Tinyoxi, vusokoti, makondlo na
mapume swi ringetile hinkwaswo
leswi a swi swi ehleketa mayelana
no siva mbhovo.

Swi tirhisile ritsandze ra mapume,
mhula na vulombe kambe a swi swi
kotangi ku siva mbhovo.

Mati ya yile emahlweni no
khulukela endzeni ka byatso kasi
levhele ya mati ebyatsweni na
yona a yi tlakukela ehenhla.




Hi nkarhi lowu swiharhi hinkwaswo
a swi chava ku nwela.

Hi nkarhi wolowo xinhlampfana a
xi hlambela xi nghena hi mbhovo
ebyatsweni.

“N’waxinhlampfana, hi pfune!” swi
kombela hi ku hiseka lokukulu.

“Ina, ndzi ta mi pfuna,” ku vula
n’waxinhlampfana.





N'waxinhlampfana u fambile a ya
landza Wali N'wankavangaheti. U
tshikelerile miri wa yena lowukulu
embhoveni, xikan'wekan'we mati ma
yima ku nghena ebyatsweni.

Eku heteleleni swiharhi swi kotile ku siva mbhovo kutani a ku nga ha ri na mati lama a ma nghena endzeni ka byatso.

Swiharhi hinkwaswo swi titwile swi ri na ku rhula kutani swi sungula ku ndhundhuzela Wali N'wankavangaheti.




Hosi N'wanghala a vula a ku, "Hi ba
mandla N'waxinhlampfana. Ndza
khensa Wali N'wankavangaheti.
Mi hi ponisile!"

Swiharhi a swi tsakele leswaku swi
nga ya emahlweni na rendzo ra
swona.

Swiharhi hinkwaswo swi
pfumelelanile, "Hinkwerhu hi nga
tisa ku hambana!"

**Loko u ri wexe u endla
leswitsongo, loko hi tirha
swin' we hi nga endla swo tala!**





Yimbelelani!

Swiharhi a swi famba hi swimbirhimbirhi, Huree!

Swiharhi swi nghena hi **swimbirhimbirhi**, Huree!

Swiharhi swi nghena hi **swimbirhimbirhi**, Huree!

Swiharhi swi nghena hi **swimbirhimbirhi**, Huree!

Ndlopfu na khangaru,

Hinkwaswo swi nghena endzeni ka areka.

Swi balekela mpfula.

Tindzimana leti landzelaka

(siva marito lama nga eka risimu

leri nga laha henhla)



nharhu	Mumpfi, risokoti na nyoxi.
mune	Dyimpfuvu dyi tsandzeka ku nghena enyangweni.
ntlhanu	Hi ku hlotana swi kota ku hanya.
tsevu	Swi hundzukela mfenhe hikwalaho ka mano ya yona.
nkombo	Xingulubyana a xi ehleketa leswaku xi ya etilweni.
nhungu	Xibodze a xi ehleketa leswaku xi ta hlwela.
kaye	Swi nghena hi ku longoloka swi ri ku macheni.
khume	Xo hetelela ku nghena a xi ri ximbahana xo tshwuka.



Xitlhokovetselo




Nyoxi ya vulombe

Nyoxi ya vulombe, ndzi rhandza risimu ra wena,
ku mbvuruma ka wena siku hinkwaro.

U kuma swiluva swa na vulombe bya swiluva
byo tsokombela,

Nsindza emilengeni ya wena wu tshame kahle.

Hambileswi ku luma ka wena ku vavaka, vulombe
bya wena byi nyanganya ku tlula swilo hinkwaswo.
Vulombe bya xinsuku byo huma exisakeni xa wena,
byi hi nyika ntsako na rihanyu.



Leswi tivekaka swo hlamarisa na ntiyiso hi swiharhi

1



Xirhodyana xa ndlopfu ko
tala xi mama nxakwa wa xona
leswaku xi tshamiseka kahle.

2



Tiyimbu ti nga tsutsuma ku
tlula 70 wa tikilomitara hi
awara.

3



Swifufunhunu swa vulongo
swi tirhisa tinyeleti tanihi
khampasi ya swona.

4



Timhisu ti yelana swinene na
swimanga ku tlula timbyana.

5



Tinghala ti etlela 20 wa
tiawara hi siku.

b



Nhutlwa yi na ririm i ra wasi
leri nga kwalomu ka 50 wa
tisentimitara.

7



Vuxungu bya mamba byi nga
dlaya vanhu va khumembirhi
eka nkarhi wa awara.

8



Timpfuvu ti sirhelela tindhawu
ta tona naswona i swiharhi
swa khombo swinene.

q



Tipangolini ti na marimi yo leha
lama damarhelaka. Loko ma
nga ri ku tirheni, ma kokeriwa
endzeni ka swifuva swa tona.

10



Tingwenya ti vile kona ku
tlula 200 wa mamiliyon i ya
malembe.

Migingiriko ya ku hlaya hi mitlawa



I

Hlayela munghana wa wena swivulwa.
Sweswi hlaya swivulwa hi nonganoko lowu faneleke
ku ku pfuna ku hlayela munghana wa wena xitori
nakambe.

1.	N'waxinhlampfana u vitanile Wali N'wankavangaheti loyi a tshikeleleke miri wa yena eka mbhovo.
2.	Swiharhi swi kunguhate ku teka rendzo ro famba hi byatso.
3.	Mapume, makondlo na tinyoxi swi ringetile ku siva mbhovo kambe swi tsandzekile.
4.	Swi sungule ku phirheka kutani N'wagongondzwana na N'watuva va sungula ku lwa.
5.	Kutani swiharhi swi kota ku siva mbhovo.
6.	Wudi N'wagongondzwana a boxa mbhovo ebyatsweni.
7.	Swiharhi hinkwaswo swi pfumelelanile leswaku ku tirha swin'we swi nga tisa ku hambana ka xijimo.
8.	Mati ya nghena hi xitalo ebyatsweni hi mbhovo.



2

Hlamusela munghana wa wena loko u xi tsakerile kumbe u nga xi tsakelangi xitori.
Seketela nhlamulo ya wena.



3

Hetisa nghingiriko lowu landzelaka.

- a. Tsala rito ro sungula ra rixaxa rin'wana na rin'wana ebukwini ya wena ya switoloveto. Kutani tsala marito lama yelanaka na rona hi mpfumawulo ekusuhi na rona.

landza	rhandza	handza	ndzima	kandza
lunghisa	tirhisa	tsakisa	khomisa	tlakusela

- b. Lava marito exitorini lama nga vamavizweni va marito lama landzelaka:
- | | | |
|-------|-------------|----------|
| nkama | xikwekwetsu | anakanya |
|-------|-------------|----------|
- c. Lava marito exitorini lama nga marito-fularha ya marito lama landzelaka:
- | | | |
|---------|---------|-------|
| -tsongo | endzeni | pfula |
|---------|---------|-------|

- d. Lava exitorini marito lama nga na mipfumawulo leyi landzelaka u tlhela u ma tsala:

sw	ph	ny	by	nw	mb
----	----	----	----	----	----

- e. Tsala nxaxameto wa swiharhi leswi nga eka xitori.
Tirhisa hefemulo ku kota ku hambanisa marito.



4

Hlamula swivutiso eka munghana wa wena hi ku vulavula ntsena.

1. I yini vito ra xitori lexi?
2. I vamani swimunhuhatwankulu swa xitori?
3. Hikwalaho ka yini swiharhi a swi chuhile?
4. U ehleketa leswaku a ku ta va ku humelele yini loko xinhlampfana a xi nga fikangi ebyatsweni?
5. Xana xitori lexi xi hi dyondzisa yini?



5

Tlhela u tsala xitori hi marito ya wena u tirhisa swihikahato leswi faneleke.

(Ndzimana yin'we ya 5 wa swivulwa.)



6

Tsala xitekatekisana hi xin'we xa swiharhi ebukwini ya wena ya switoloveto u tlhela u xi hlayela munghana wa wena.

Nhlonge ya mina i ya rihlaza no rheta.

Ndzi na milenge ya mune na minkondzo yo khomana.

Ndzi dya tinsikit na swinhlampfana.

Ndzi nga hlambela ehansi ka mati no tlulatlula emisaveni.

Xana ndzi yini?

